



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7



Amritsar police tekolakba
transfer sütsüogo



Tanü De La Espriella-i
Colombia tir mapa agizüksü

VOL. XXIII ISSUE NO. 296 (ADOK 296) DIMAPUR KÜPTOKNÜ (SATURDAY) LUROI (AUGUST) 08, 2026 ₹ 5.00

Governor-i 14 buba NLA session tugububa jazüker

Dimapur, August 7, 2026 (TYO): Nagaland Governor Nand Kishore Yadav-i 14 buba Nagaland Legislative Assembly indang Session tugububa jazükogo.

Nagaland Governor-i September 1, 2026 anepdang 9:30 ako nung Nagaland Legislative Assembly, Kohima indang Assembly Hall nung Session amentsü metetdaksüogo.

CEO Nagaland-i SIR-Phase III indang metetdaksür

Dimapur, August 7, 2026 (TYO): Nagaland nung Electoral Roll indang Special Intensive Revision (SIR) inyakdar aser iba atema qualifying date ji October 1, 2026 lir ta Chief Electoral Officer Nagaland-i metetdaksüogo.

SIR maparen asoshi state kübok tesem balala nung preparatory activities aser capacity-building programmes agia arudar ta CEO Nagaland-isa ashi.

Maneni, District Election

Offices ajak nung public yaritsü atema designated helpline numbers den dedicated personnel-i ketdangsüa SIR Help Desks lapoka lir.

Item indang Help Desks ya Chief Electoral Officer, Nagaland indang website <https://ceo.nagaland.gov.in> nung lir. Sensotemi toll-free helpline 1950 ajanga SIR dak sendakba osangtsüsang metetpelatsü akok ta CEO Nagaland-isa metetdaksüogo.

CAWD-i DC Office Complex yangluba semdang

Dimapur, August 7, 2026 (TYO): Civil Administration Works Division (CAWD)-i Hokolbarnü Dimapur aser Niuland nung Deputy Commissioner's (DC) Office Complex yangluba semdangogo.

Assistant Chief Engineer (ACE), CAWD, Er. Sungtiba Amer-i anir CAWD ketdangsürtem, administrative ketdangsürtem, engineer aser contractor tem tenüng nung teshimtet nübotemi ki yangluba rebrandanga senzüogo.

Dimapur nung temulung süa mapatong inyaka arudar aser iba mapa inyakba piyong jungjunga inyaksüla ta Er. Amer-i ashi.

Iba mapatong atema original work order ji November 7, 2025 nungi tenzüker ita 24 lir saka ki tejenba bendoker ang tasen tenzüker asünung ita tenet shi talila agitsü akok ta pai ashi.

Iba mapatong ya modern G+2 Deputy Commissioner's Office Complex ka lir aser Chief Architect, PWD (Planning & Design) ajanga design asü. Iba mapatong ya CAWD-i executing agency ama inyaker.

Tanü CAWD telokisa Niuland nung Deputy Commissioner's Office Complex yangluba semdanga liasü aser idangji Deputy Commissioner T. L. Kiusumong Tikhir, administrative ketdangsürtem, engineer aser contractor nunger liasü.

Iba mapatong ya Special Assistance to States for Capital Investment (SASCI) scheme kübok inyaker aser 2024 nungi G+3 office complex ka yanglur.

Er. Amer-i mapa inyaka aruba nung temulung asüba lemsatop aser contractor dang mapang mapang lateta aliba tsüngda renemtsü tetuyuba agütsü.

Er. Amer-isa Chief Minister Dr. Neiphiu Rio-i administrative infrastructure nung temulung agüja senotsü nüngdakba agütsüba atema pelaba metetdaksü.

Sorkar teyari ajanga CAWD-i Tuensang, Noklak, Shamator, Wokha, Tseminyu, Meluri asern Zunheboto nung DC office complexes dena infrastructure projects tongtipang aika renemogo ta pai ashi.

MP Supongmeren-i Civil Aviation Minister dang mepishir

Dimapur, August 7, 2026 (TYO): Lok Sabha MP S. Supongmeren Jamir-i Bengaluru-Kolkata-Guwahati-Dimapur-Imphal sendaktepba Air India Express services tenzükshtsü atema ayongzüko.

MP Supongmeren-i iba onük atema Union Minister for Civil Aviation, Kinjarapu Ram Mohan Naidu dangi züluba shidi nung Delhi-Kolkata-Guwahati-Dimapur Air India Express service küm ka jungnüa mesenzüi arur lir aser iba ajanga Assam, Nagaland, aser Manipur nungi ainlen senzürtemi timtem ajurur ta shia lir.

August 1, 2026 nungi Air India Express-isa Bengaluru-Kolkata-Guwahati-Dimapur service anenogo aser iba ajanga Northeast

nung air connectivity ajema kümogo. Iba ajanga kaketshirtem, shirangertem, shishilembartem, sorkar ketdangsürtem aser public nem khuret talila bentsür arur ta paiza shidi nung ashi.

Ministry of Civil Aviation-i Air India Express routes anena alibatem tanaben tenzükshtsü mesüra yanga airline ka ajanga Bengaluru, Kolkata, Guwahati, Dimapur, aser Imphal sendaktepa services tenzüksü atema meratem agidaksünür ta MP Supongmeren-isa mepishiogo.

Paisa Union Civil Aviation Minister Naidu dang iba khuret ya tongtipang ta agizüksü aser tekaratiba nung public taginüba ama air services tenzükshtsü asoshi mapa inyaksü mepishiogo.

CM Dr. Rio-i Chief Minister's Yarn Bank Scheme tenzüksü

Dimapur, August 7, 2026 (TYO): August 7, 2026 nü 12 buba National Handloom Day amungdang Chief Minister Dr. Neiphiu Rio-i Chief Minister's Yarn Bank Scheme tenzüksüogo.

Iba ya Nagaland nung handloom sector tashi aittsüba aser weavers meyrjang aika ajangzüksüba mapa ka lir ta CM Dr. Rio-i ashi.

"National Handloom Day ya traditional craft benjungba anogo ka dang masü saka putu aika Naga nunger maitüsü, sobaliba aser tangatetba len anir aruba senmang nem tetushi agütsüba mapang ka lir. Sü tabentsü, süpeti aser atakba sü ajak agi Naga kin balala indang otsü ashir" ta pai ashi.

Nagaland nung sü atakertem, talisa tetsürtem ya handloom sector tongtired lir. Parnoki bendanga agütsüba, timtem aremba aser teka mapa kanga junga inyaktetba atema tenüngsang agütsür ta Dr. Rio-isa shisem.

Sü atakertemi jenjang dalang agi ang tajung mangur aser iba atema parnoki raw materials alitsü atema meta talangi aoer. Item khuret koktetsü atema CM Dr. Rio-i Chief Minister's Yarn

Bank Scheme tenzüker aser District Industries Centre, State Industrial Park, Toluvi, Dimapur nung dedicated & centralized facility ka amenokogo.

Iba Yarn Bank nung Nagaland tesem balala nungi sü atakertemi high-quality natural yarn angutsü ta Chief Minister Dr. Rio-i ashi.

Iba scheme kübok mill-gate jenjan nung cotton, eri silk, muga silk, bamboo fibre aser tanga natural fibre blends angutsü. Iba dak alia Nagaland sorkari 15% subsidy agütsütsü aser iba ajanga quality raw materials jenjang dalangba agi angutsü ta paiza ashi.

Iba scheme ajanga kümshi sü ataker nisung 5,000 aser 10,000 shi ajangzüksü imlar. Yarn Pass Book aliba sü atakertemi Yarn Bank nungi indangindanga ang alitetsü ta Dr. Rio-isa metetdaksü.

"National Handloom Day ya India nung handloom tradition takar benjungtsü aser linük kübok tesem balala nung sü atakertem nem tetushi agütsütsü atema lir" ta Industries & Commerce, Advisor Hekani Jakhalu-i ashi.

Chief Minister's Yarn Bank Scheme tenzüker ya Nagaland atema tongtipang alizüng ka lir ta

lai ashi.

"Chief Minister Dr. Rio tebilemtsü khuret aser teinyaktsü aika liaka handloom & textile sector teti nungita arur. Kümtem süia arudang Department of Industries & Commerce-i textile division nung maparen jenti inyaka aruogo aser Yarn Bank ya kanga nüngdaka aliba ka liasü. Chief Minister-i CM innovative fund 2025-2026 nung sen otsü lemozüksüba ajanga iba mapa asangsang nung atalokogo" ta Hekani-isa ashi.

Chief Minister's Yarn Bank nungi teyari agitsü atema sü ataker ket nung Handloom Mark (HM) Identity Card ka alitsüla aser designated mobile application ajanga register asütsü. Maneni State Handloom Database aser census records ajanga verification asütsü aser department-i chichiba sü ataker ajaki tajangzüker angutsü atema State's weavers' database update südar ta laisa metetdaksüogo.

Iba scheme nung register asütsüpurtem arishi küm 18 bosa aser active weavers asütsüla. Maneni, züngsem 10 tashi aliba registered cooperative societies-ia scheme kübok teyari angutsü ta Advisor Hekani-isa metetdaksü.

CNTC aser CNLF Joint Coordination Meeting amen

Dimapur, August 7, 2026 (TYO): Central Nagaland Tribes Council (CNTC)-i Central Nagaland Legislative Forum (CNLF) den yaritepa Dimapur Town Hall nung Joint Coordination Meeting ayonga menogo.

Iba senden nung minister, advisers, MLAs, kin lennirtem aser Ao, Lotha p Sümi nunger telok balala nungi teshimtet nübotem aden.

CNTC President Hukiye K. Yephthomi-i tesentepertem ajak pelashishia agizüka jembidang nübortem tsüngda telongjem, amalitep aser külemi yaritepa aotsü indang nenshia ashi.

Iba senden nung Deputy Chief Minister Y. Patton (Home & Border Affairs); Roads & Bridges Minister G. Kaito Aye; Rural Development Minister Metsubo Jamir; Deputy Speaker S. Toiho Yephtho; Adviser Tongpang Ozukum; Tourism and Higher & Technical Education Minister Temjen Imna Along; Industries & Commerce Adviser Hekani Jakhalu; Agriculture Adviser Mhathung Yanthan; Excise, Labour & Employment and Skill Development Adviser

Moatoshi; Food & Civil Supplies Adviser K.T. Sukhalu; Veterinary & Animal Husbandry Adviser Kazheto Kinimi; Information & Public Relations and Soil & Water Conservation Adviser Daochir L. Imchen; aser MLA Dr. Sukhato A. Sema nunger aden.

Senden nungsa Ao Senden, Lotha Hoho, Sümi Hoho, Sümi Kükami Hoho, Western Sümi Hoho, Ao Officers' Telongjem, Lotha Gazetted Officers' Association, Sümi Officers' Union Nagaland, Central Nagaland Women Association, Watsu Mungdang, Lotha Eloee Hoho, Sümi Totimi Hoho, Central Nagaland Students' Association, Ao Kaketshir Mungdang, Lotha Students' Union, Sümi Kiphimi Kükhakulu, Ao Lanur Telongjem, Lotha Youth Hoho, Sümi Youth Organisation, Western Sümi Youth Front, Ao Union Club, Dimapur Lotha Hoho, Dimapur Sümi Students' Union, Western Sümi Totimi Hoho, Dimapur Ao Youth Organisation, Sümi Games & Sports Association, Ao Students' Union Dimapur, taoba CNTC ketdangpurtem, Dimapur Lotha Eloee Ekhung, Kohima

Sümi Hoho aser CLH teloktem aden.

Ao Senden President Marsanen, Lotha Hoho Chairman Er. Mhondamo Ovung, Sümi Hoho President Dr. Vihuto Assumi nunger den telok balala nungi lennirtemi o jembu.

Maneni, G. Kaito Aye, Y. Patton, Metsubo Jamir, S. Toiho Yephtho aser Tongpang Ozukum nungeri jembidang Naga loktiliba kanga lemsaogo aser longjemtsü nüngdaker ta tebilembatem lemsatop.

CNTC ya olemtep, amalitep aser külemi inyaksangshitsü asoshi sabang ka asütsü amanger. Ao, Lotha aser Sümi kintem ya state nung samanirtem kintem rongnung dena lir anungji asenok külemi inyaksangshitsü tebilemtsü khuret lir aser Nagaland ajunga ajungtsü, sünepa alitsü aser tejakleni aotsüba nung shilem tajung agitsüla ta parnokisa ashi.

Tanü inaugural session nung mendenji Vice President, CNTC Longshi Kikon liasü aser tanabuba session atema onirji Information & Publicity Secretary, CNTC Vikato I. Chishi liasü.

NDMSA 5 buba mungdang aser 50 buba lokti senden liogo



Dimapur, Luroi/August 07 (TYO): Nagaland Directorate Ministerial Service Association (NDMSA) indang 5th Biennial Conference-cum-50th General Meeting Hokulbarnü Capital Convention Centre, Kohima nung liogo, kong sentong akhumdong Director General of Police (DGP), Nagaland, Rupin Sharma, IPS liasü.

Sharma-i iba sentong nung jembidang sorkar indang office tem nung file kanga junga anepalua ayutsü aser amshitsü tongtipang lir ta ashi. Public service examinations ajanga shimba lanurtem dak directorates nung ministerial establishment nung shilem tajung agitetsü shisatsü aser tashi lir, aser kasa mapang senior staff dak tajangshiba aser shisatsü aliba den tejangraba tulu aliba lanurtem meyoktepba ajanga sorkar indang offices tem inyaksangshiba tali tashi itshitsü, ta pai ashi.

Sharma-i ministerial staff ajunga dang government services indang ozüing aser inyakyim, aser talisa Nagaland Government Servants Conduct Rules junga angatetsü ajungmesoa liasü.

Pai parnok dang state sorkar inyakyim tajungba akumtsü merangba nung timtem ajuruba tera jangjateta bentettsü ayongzüka liasü.

Nagaland Public Works Department (NPWD) nung mezüngbuba Administrative Officer, Kroneicho Naki-i tajungshi o jembidang, Association-i küm ter dak tema Administrative Officer post yanglutsü merangba bilemteta jembi. Mapang talangka nungi aginüa aliba angatetba asoshi Government of Nagaland dang pelaba lemsatop aser department indang mezüngbuba Administrative Officer ama inyaksü ya konang tulu lir ta pai ashi.

Naki-i ministerial staff ya sorkari indang tongtoret lir ta ashi aser parnok dang pei mapa ochishia, yimya shidak amshia aser nendaka inyaksü ayongzüka liasü.

Vice President, CANSSEA aser Additional Director, Department of Food & Civil Supplies, I. Anungba Sanglir-i tajungshi o jembidang, Nagaland nung sorkar mapa inyakba lokti balala rongnung CANSSEA ya tematiba tentet

ka ama maparen balala inyaka aruba lemsatopa liasü.

Association-i employees tebilemba sorkar dangi bener arutsü asoshi tanen makai inyaker aser ana tsüingta tesendaktep tajung lidaktsüsü meranger, ta pai ashi.

Service conditions, pay, pension aser employees' welfare dak sendakba ken o tem den CANSSEA ajanga Chief Minister's Health Insurance Scheme (CMHIS) inyakyim nunga tongti shilem agir ta ashi. Parnoki pension temelenshi atema inyaka arur aser State nung Revision of Pay (ROP) tasenba mapa kuma amshitsü atema inyaka arur ta ashi.

Item takok ya züingsem temi kasa tangatetba nung inyakba ajanga lir, ta Sanglir-i ashi aser NDMSA dang maneni telungjem nung bendanga agütsür pei mapa shidak inyaksü ajungmesoa liasü.

Nagaland Directorate Ministerial Service Association tenüing nung Bendangsenla-i pela agizükba o jembi aser association takok anguba benjongtetba asoshi pelaba lemsatopa liasü.

DoH&FW-i jangjashitsür

Dimapur, Luroi/August 07 (TYO): World Hepatitis Day 2026 dak sendakba nung osang prokshiba aser press advertisement agütsüba nung Network of Nagaland Drugs and AIDS Organization (NNaDAO) ajanga jangjashitsü tezüluba nung agütsüba sülen Department of Health & Family Welfare, Nagaland ajanga jangjashitsüba sangdong ka agütsüogo.

DoH&FW ajanga ashiba agi, Hepatitis B aser Hepatitis C Screening Tests ya District Hospitals, CHCs timba, PHCs aser HWCs kar nung angati angutsü.

District Hospitalstem nung Hepatitis B & C atema Viral

Load Testing angati agütsür, Treatment Centres ama shima aliba Distrct Hospitals tem nung Hepatitis B aser C angati anepalur.

Hepatitis B & C Positive patients atema Liver Function Test (LFT), Renal Function Test (RFT), Complete Blood Count (CBC), Ultrasound sonography (USG) Abdomen, Fibroscan, Prothrombin Time ama Baseline Investigations angati agütsütsü districts tem nem temelaba agütsüogo. Nation Viral Hepatitis Control Program (NVHCP) services indang osang matetner temi anasatiba Government Health Facility nung tongteprateptsü akok, ta DoH&FW sangdong ajangasa ashi.

Tuli nung SIR dak sendakba senden August 10 nü amentsü

Dimapur, Luroi/August 07 (TYO): Additional Deputy Commissioner, Tuli Sub-division ajanga 21-Tuli Assembly Constituency kübok recognized political party ajunga dang Electoral Roll indang Special Intensive Revision (SIR) dak sendakba senden ka August 10,

2026 nikongdang 1:00 ako nungi tenzüka ADC, Tuli indang office nung amentsü, ta metetdaksüogo.

Iba senden nung recognized political party ajunga nungi arua adentsü metetdaksür, ta ADC Tuli ajangasa metetdaksü.

Kohima DWSM-i GPDP renemshiba asadanga senden amen

Dimapur, Luroi/August 07 (TYO): 16th Finance Commission dak sendakba nung District Water and Sanitation Mission (DWSM) indang senden ka Deputy Commissioner, Kohima indang office chamber nung August 6, 2026 nü Deputy Commissioner, Kohima, B. Henok Buchem, NCS lenisüba kübok mena liasü.

Iba senden nung Gram Panchayat Development Plan (GPDP) kübok maparen balala junga inyaksü atema sendaktepa aliba department tem lungjemtsü nüngdakba indang jembia liasü.

GPDP portal nung upload asütsü atema Public Health Engineering Department (PHED) ajanga GPDP Annual Action Plan village-wise yanglur village list ya Rural Development Department nem

agütsütsü parnoki lemteta liasü.

Iba senden nung GPDP renemba inyakyim, portal uploading, mapang telatet aser department balala tsüingta amalitep akatsü indanga jembia liasü.

Mapang shidak nung inyakyim tembangtsü asoshi sendaktepa aliba department temi shilem agia osang agütsüteptsü parnoki jembi.

GPDP projects atema tesem shimba ya yimtsüing nung alirtemi nüngdakba nung ajemdaker alitsü aser nüburtem nem teyari timtiba agütsütsü nükjidong nung inyaksü.

DC ajanga PHED dang 16th Finance Commission dak sendakba GPDP Action Plan renemtsü nungloksü aser ano maneni jembishinü akatsü parnoki pangjema liasü.

Chümoukedima nung FC-XVI Tied Grants indang orientation agütsü

Dimapur, Luroi/August 07 (TYO): XVI Finance Commission (FC-XVI) Tied Grants for Water and Sanitation amshitsü indang District-Level Orientation Programme ka August 7, 2026 nü Deputy Commissioner, Chümoukedima indang Conference Hall nung ayongzüka liasü.

Iba senden nung Deputy Commissioner and Chairperson, District Water and Sanitation Mission (DWSM), Chümoukedima, Polan John, NCS ajanga sentong junga yanglutsü, ochishia mapa shidak inyaka district nung tajemtsü tzi

agütsüba, sanitation aser solid waste management maparen tashi ita inyaksü tongtipang ta nenshia ashi.

Public Health Engineering Department (PHED) aser Rural Development Department (RDD) nungi ketdangsür temi operational guidelines, planning, fund utilization aser FC-XVI Tied Grants indang technical sessions agia liasü.

Yimtsüing sasep nung tzi aser mürekmejuba projects tem tajungtiba nung takok ngua inyaksü asoshi sensaksema iba senden tembanga liasü.

Kohima nung BBBP Scholarship angur tushiba sentong agi

Dimapur, Luroi/August 07 (TYO): District Administration Kohima ajanga SANKALP - District Hub for Empowerment of Women (DHEW), Social Welfare Department den lungjemer "Educate Her, Empower Her" Beti Bachao Beti Padhao (BBBP) Scholarship Awardees nem tetushi agütsüba sentong ka Deputy Commissioner, Kohima indang Conference Hall nung August 7, 2026 nü ayongzüka liasü.

Deputy Commissioner and Chairman, District Level Committee, Mission Shakti, Kohima, B. Henok Buchem, NCS ajanga iba sentong tenzüka jembidang scholarship angurtem nem tenüingsang agütsü aser parnok nem iba konang agütsüba ya jenjang tulu ama züingshitsü ajungshia liasü.

Kulizüing kaket tem ajanga district administration-i nenok sempet nung amanger ta angatetsüla aser nenoki künu nüburtem nem meyipa agütsütsü imlar, ta pai ashi.

Pai kaketshirtem dang ochishia alitsü, teti metetnüa alitsü, tekolok lapoker pei nükjidong bushiba nung textbook kisüing nung merangloksüla, ta ashi.

Iba sentong nung menden Extra Assistant Commissioner (EAC), Kohima, Ane Khieya-i Beti Bachao Beti Padhao ya sorkar indang scheme ka dang masü saka tetsür shia nem pei sempet jangjatetsü tashi agütsür, ta ashi.

Iba sentong nung academic excellence aser tanga criteria nung ajemdaker "Educate Her, Empower Her" BBBP Scholarship kübok tetsür kaketshir 20 nem tetushi agüja liasü.

Sempet angur shia nem kulizüing kaket ka-ka sen sen 10,000 agüja liasü.

Scholarship angurtem tenüing nung BBBP Scholarship Awardee aser BBBP Ambassador 2025-26 ajanga District Administration aser stakeholders tem dang parnok yariba atema pelaba lemsatopa liasü.

BBBP ya sorkar indang scheme dak tali lir aser iba yagi parnok mangdang bushiba nung ajungmesor aser lokti asoshi shilem tajung agiteter, ta ashi. Parnoki maneni meranga inyaka tangartem ajungmesotsü ta ashi.

Iba sentong tembangba sülen BBBP indang quarterly District Level Committee meeting mena liasü.

Iba senden nung Vidilhounuo Solo, Specialist in Financial Literacy, DHEW Kohima ajanga FY 2026-27 indang mezüing quareter nung maparen balala inyakba osang lemsatopa liasü.

Iba mapang Mission Shakti, menstrual hygiene, child rights, child protection, POCSO Act, mental health, financial literacy aser Pradhan Mantri Mudra Yojana (PMMY) den tetsürtem atema skill development aser counselling sentong ayongzüka, süngdong atemba, sanitary pads, school bags, stationery aser BBBP T-shirts lema agütsüba, teinlonglong tetsürtem atema reju aser yimtsüing balala nung life skills training ayongzüka indang osang metetdaksü.

Iba sülen Kesoneinu, Gender Specialist, DHEW Kohima ajanga FY 2026-27 atema action plan lemsatopdang Women and Child Development, School Education, Sports and Youth Affairs, Home and Police, Rural Development aser Agriculture & Allied sectors department tem den teka amteper maparen balala inyaka aotsüba indang ashi.

District nung BBBP inyakyim tashi itshitsü atema District Level Committee züingsem temi shisa lemsatopa senden tembang.

Sorkari August 12 nü FCRA amendment bill benoktsü

New Delhi, Luroi/August 07 (Agencies): Centre sorkari August 12, 2026 nü Parliament nung Foreign Contribution (Regulation) Amendment Bill, 2026 benoktsü aser tzüngluruwa mongpu senden metembangdangsa House anaprongla nung iba bill agizüktsü merangtsü.

Union Home Minister Amit Shah aser Parliamentary Affairs Minister Kiren Rijiju nati jelia opposition party balala nungi züngsemtem aser yimsü lenirtem ajurua Parliament nung iba bill pusemtsü atema mepishioغو.

Foreign Contribution (Regulation) amendment bill ya mezüنگ taküm March 25 nü Lok Sabha nung tama benoka liasü.

Brihostibarnü Mizoram Chief Minister Lalduhoma leniba nung Aroغو nung lenirtem telok kati Amit Shah ajurua iba bill dak sendakba nung takhangba trok agütsüogo. —Lalduhoma-i, "Onok pa den

onük trok lemsatepogo. Iba nungjagi pai (Amit Shah) kü dang, iba bill ajanga kecha mekongshitsü ta shioغو. Tanüنگba onüktem dak sendakba nung pai tezüluba nung telangzüba agütsütsü ta shioغو," ta metetdaksü.

Amit Shah-i, iba bill ya Khristantem anema masü, ta ashi. Senden ka nungbo pai, bendanglen nungi tenla aruba sen crore 17,000 nungi sen crore 3,000 dang Khristan melungtet teloktem indang liasü, ta ashi.

Bodhbarnüa Ahah-i Aroغو nungi teshimtet lenirtem telok ka ajurua liasü.

Bodhbarnü Parliamentary Affairs Minister Kiren Rijiju-ia Lok Sabha nung Opposition lenir, Rahul Gandhi den senden amenba mapang nung iba onük süoka liasü.

West Virginia, US nungi Republican Congressman, Riley Moore-ibo yimjak nung iba bill aija, iba ya Khristantem anema lir, ta metetdaksüogo.

Moore-i X ajanga, FCRA amendments ya ajanga bendang linüktemi senotsü agi yariba Aroغوtem aser Khristan melungtet teloktem azüoktsü atema India sorkar nem temelaba agütsütsü; iba bill ya agizükra ibaji ajanga India-US tesendaktep raksatsü, ta shioغو.

FCRA amendment bill ya agizüka ozüنگ kümra melungtet teloktem registration thinentsüba mesüra anenba sülen parnok indang kiojenji sorkari agiadoktsü.

Melungtet teloktem jagi mapang shidak nung tanaben license ngura kiojenji tanaben agitsü akok, saka mapang süidaktsüra teti atema sorkar meyong kümadoktsü.

Parliamentary Affairs Minister Kiren Rijiju-i, tzüngluruwa mongpu senden anogo atsülangtsü mesüra Women's reservation aser delimitation bills atema temeja senden ayongzüksü tebilemba mali, ta metetdaksüogo.

yakyaka lir," ta ashi.

Shipping Minister Sarbananda Sonowal tetuyuba nung ajemdaker DGMA-i rara aliba tesemtem nung tzüyim nung senzür India nunger ajak kümzüka alitsü atema mita repranger.

Kasa sentong nung jembidang Sonowal-i, tzüyim nung India nunger tashi tuluba akümer aser tzüyim nung security khuret-a tuluba dang akümer, ta ashi.

India, China nati diplomatic, military channel tem amshitsü mulungtep

New Delhi, Luroi/August 7 (Agencies): India aser China nati Line of Actual Control (LAC) nung tensa kanga junga asadangogo aser arrtsü delimitation, arrtsü ketdangsüba aser arrtsü adena tesendaktep dak sendakba nung sensaksem kaogo.

New Delhi nung India-China Border Affairs dak sendakba nung 36buba Working Mechanism for Consultation and Coordination (WMCC) senden amenba mapang iba sensaksem agia liasü.

"Linük anapronglai kanga sadoka sensaksemogo aser LAC nung tensa asadangogo," ta Ministry of External Affairs (MEA)-i Hokolbarnü metetdaksü.

MEA-i ashiba agi, linük anapronglai lenla ajak nung tesendaktep terenlok asoshi arrtsü yimjiyimjung nung toktsütsü koda tongtibang iba indang lemsatepa liasü.

"Linük anapronglai ken o mebentet alibatem bentettsü aser LAC nung mangatettep adoktsü aliba nungi pila alitsü atema WMCC, local commander-level senden aser tanga inyakyim densema tang benoka aliba diplomatic aser

military channel tem amshitsü mulungtepogo," ta ministry-isa shisem.

24buba Special Representatives' sensaksem nung telemtetba balala agiba dak ajemdaker tang iba sensaksem kaogo, aser linük anapronglai arrtsü delimitation, arrtsü ketdangsüba, mechanism-building aser arrtsü adena tesendaktep dak sendakba nung osang tejangja lemsatepogo.

India-isa, trans-border ayong dak sendakba nung Expert Level Mechanism senden ka takaratiba nung amentsü nüngdakba lemsatepogo aser ayongbanglen mapa balala benoka inyakba indang technical osang tejangja lemsateptsü koda tongtibang indang lemsatepa liasü, ta MEA-i ashi.

India nunger ketdangsürtem MEA, Joint Secretary (East Asia) Sujit Ghosh lenisüba nung iba senden nung shilem agi aser China nunger ketdangsürtem ya China indang Ministry of Foreign Affairs kübok Boundary and Oceanic Affairs Department Director General Hou Yanqi lenisüba nung iba senden nung shilem agia liasü.

Amritsar police tekolakba transfer sütsüogo



New Delhi, Luroi/August 7 (Agencies): Punjab nung police-i Pakistan-i teyari agütsüba terror module pa putetba indang sangdongba sülen anogo ishika lir Amritsar Police tekolakba Gurpreet Singh Bhullar transfer yokba ya aikati ashishioغو.

Amritsar commissionerate-i, minor pezü densema nisung tekु den pistol asem, injang tekु aser petrol bottle bomb pezü apuba osang metetdaksüogo. Police-i ashiba agi, aija alirtem ya bendanglen amendaker aliba ISI handler tem tetuyuba nung inyaksangshia liasü aser parnoki security installations tem meita oa liasü.

Jantar Mantar nung longkak aitba mapang kiralongrartema sendaka liasü ta osang temai adokba sülen tang iba ya atalokba ajanga ken o kanga tongtibang kümogo. August 4 nü Bhullar-i, bushisüنگdang ajanga pua alirtem ya kari Jantar Mantar semdanga

asadang aser longkak aitertem dak petrol bomb mereploksütsü sentong yangluba ngutetogo, ta ashi.

Iba sülen Punjab sorkari ken o jangjashitsü aser ashiba agi, police commissioner-i aija alirtem ya Jantar Mantar nung longkak aitba nung shilem agi ta mashi, mesüra longkak aitertem ya kiralongrar den sendaka liasü ta mashi.

Sorkari ashiba agi, police tekolakbai jembiba o kar shimteta edit asüba ajanga pua alirtem ya longkak aitertem den sendaka liasü ama sayuogo.

Ajisüaka iba olen lemsatepba sülen Bhullar transfer yokba ajanga, pai iba olen lemsatepba ajanga iba telemtetba ya agi asü ta bilemer. Ajisüaka pa transfer yokba ya Jantar Mantar den sendaka lir ta ketdangsürtemi osang kecha magütsü.

Iba jenjang agiba ajanga yimden yimsüsüba nunga kongshioغو. Punjab sorkar aitsürtemi Bhullar ya Aam Aadmi Party (AAP) den kanga junga sendaktepa aliba ajanga pa aija aruogo aser pa ya ruling party atema inyaktsür ka ta shia aruogo.

"Gurpreet Bhullar tang transfer yokba ajanga aikati ken o ashishitsü. Pai Jantar Mantar nung tatalokba indang metetdaksüba ajanga Kejriwal shisabulur asü," ta taoba mapang Union Minister of State Ravneet Singh Bittu-i ashi.

GOVERNMENT OF NAGALAND

DIRECTORATE OF SCHOOL EDUCATION

NAGALAND : KOHIMA

NO. ED/NIOS-BC/2025

Kohima, the 5th August 2026

NOTIFICATION

Pursuant to the Judgment dated 08/04/2024 passed by the Hon'ble Supreme Court of India in M.A. Diary No. 4303/2024 in Civil Appeal No. 5068 of 2023, all Primary Teachers appointed with professional qualification of B. Ed degree during the period 28/06/2018 to 10/08/2023 were directed to undergo the six months Bridge Course conducted by the National Institute of Open Schooling (NIOS), admissions for which were closed on 19/07/2026.

Subsequent to the aforesaid Judgment, a number of teachers who consider themselves outside the ambit of the Hon'ble Supreme Court's Judgment and the NCTE Recognition Order approached various Hon'ble High Courts, including the Hon'ble High Court of Madhya Pradesh at Jabalpur, by way of writ petitions. The Hon'ble High Court granted NIOS a further and final period of 15 days to open the portal.

In compliance with the directions of the Hon'ble High Court, the NIOS registration portal is opened strictly for the limited category of teachers covered by subsisting interim orders of the Hon'ble High Court(s), on the terms and conditions set out in the NIOS Notification F. No. 82-20/2025/NIOS/CBC/BRIDGE/Corr. dated 28/07/2026.

Eligibility Criteria:

- A teacher shall be eligible to seek provisional enrolment under this Notification only if all of the following conditions are cumulatively satisfied:
- The applicant is a party (petitioner) to a writ petition pending before a Hon'ble High Court in which an interim order permitting provisional enrolment in the Bridge Course has been passed and subsists as on the date of application.
- The applicant is not covered under, or does not fall within the ambit of, the judgment dated 08/04/2024 of the Hon'ble Supreme Court of India in M.A. Diary No. 4303/2024 in Civil Appeal No. 5068 of 2023 (Devesh Sharma Vs. Union of India & Ors.)
- The applicant is not covered under the NCTE Recognition Order to the extent it already governs regular enrolment.
- The interim order relied upon has not been stayed, modified, vacated, or superseded by any subsequent order of the same Hon'ble High Court, another Hon'ble High Court, or the Hon'ble Supreme Court.

The registration portal <https://bridge.nios.ac.in> shall remain open from 30/07/2026 to 30/08/2026 for submission of online applications by such eligible teachers who hold a valid, subsisting order of a Hon'ble High Court permitting provisional enrolment. Eligible teachers are advised to refer NIOS Notification dated 28/07/2026 available at the aforementioned NIOS portal for further details.

RAZOUSEYIVESE

Director



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 08, 2026

Naga yimtenbo yamai dang aotsü !

Naga yimten temeten ken o tasübo masü taküm lir saka Naga yimten temeten ken o ya tatembang kuma latettsübo mapa tasakba tasakba kuma odagi. Aji oda, Naga yimten tebilemtsü ya kokteta ken o tembangtsüba mapa ya tamakoktsübo masütsüa akok saka tangsabo makoktsü amai repranger. Atangji, Naga nunger nübortem asoshia temangmangtsü kaji, Naga yimten tebilemtsü ken o ya tang tashi nung India den jembia aruba jenjang aser tia ya lir, kechiyong Naga yimten nüchiso bushir telok ajak den yimjung nung Naga yimten ken o jembiba sülen tangatettep kati aruogo ta sangdonger joko küm ter dak tali süir. Ajisüaka India government o Naga yimten nüchiso bushirtem na tsüngda Naga yimten ken o tembanga jembiba sülen küm ter süia yimten ken o tangatettep kati arua jembibaji mapa kuma meinyaktet süidaktsübaji India government asü, Naga nunger tai asütsü ? Naga nunger yimten nüchiso bushir telok onsara asüba agi, Naga nunger ajak tenüng nung telok kati jembitsü mekoki aküm nungji, telok ana kümer, mezüng NSCN-IM teloki India den 2015 küm August 03 nü Naga yimten tebilemtsü ken o tembanga jembir alima dang sangdongba asenokia angashiogo aser iba telemtetba dang panroki " Framework Agreement" ta aja. Iba sülen ano tanüngba NSCN aser NNC teloktem lungjemer 2017 küm November 17 nü India den Naga yimten ken o tembanga jembir aser parnoki iba dangji "Agreed Position" ta aja. Aji oda, tang tashi nung Framework Agreement o Agreed Position naji India government o Naga yimten nüchiso bushirtem na tsüngda Naga yimten latettsü asoshi tenangzüktepba ken o lir, anungji mapa kuma inyaktsüla. Ajisüaka, yimten tebilemtsü koka ken o jembiba sülen, telok ajaki mulunga agizüka renemba ken o ji mapa kuma meinyaktetra, iba ken o ji tamakitsü akümang shitak, kechiyong mapa kuma meinyaktetba terenemba ken o ji mapa kuma inyaktsüba ama ayutsü menügdaker. Ajisüaka, Naga yimten telok karibo India den yimten ken o tangatettep yangluba anogoji takok tulu anguba anogo amai amunger, ajisüaka asenok Naga nunger asoshi, tang tashi nungbo, Framework Agreement aser Agreed Position na renemba anogo ya India-i Naga nunger mesüshiba anogo asütsü, anungji Framework yangluba anogo ya takok anguba anogo amai amungtsüa menügdaker aser Agreed Position nung renema akaba ken otema ataloktsü amai ataa alitsüa menügdaker. Iba jagi, ashiko, state government-i India o Naga nunger yimten nüchiso bushirtem na tsüngda o tongdar, interlocutor, ano tasen ka shimtsü akanger südi. Atangji, NNPGs purtem ashiba ama, India o Naga nunger na tsüngda Naga yimten ken o tembanga jembir alinung, ano parnok tsüngda o tongdar tasen ka shimtsübaji menügdaker, saka nungdakbajibo ken o renema jembir alibaji mapa kuma inyak tenzüksüla. Ajisüaka, kodang asangsang nung reprangdangdir, tebang agi India o Naga nunger yimten nüchiso bushirtem na tsüngda yimten tebilemtsü ken o ajak tembanga jembioogo ta ashiyonga, yimten ken o renema jembiba kecha mapa kuma maor, anungji jembishitsüsa akümer. Aji oda, asenoka India den yimten ken o renema jembir senshiba to mapa mekümra , asenoki India bushia oagi asenok ajaki mulunga renemba ken o to koda asü (?) ta asüngdangtsübaji tensa mapang aser mapa agi akanger. Ajisüaka, ken o ajak tembanga jembiba sülen terenemba ken o ji mapabo maküm aser ken o renema jembirtem toa majurutepteter ta asüba tia nung lia lira, atangji parnok asoshi o tongdar ka nungdaktsü. Aji oda, asenoki aginü maginü ta masü Framework Agreement o Agreed Position na prongla ya India den khien reprangshitsüsa kümogo. Naga nungersa tia majung, India den Naga yimten ken o tatembang kuma jembioogo ta sangdongba to tiyazü asü aser shisabolutsüka, Naga nungerbo ano yimten nüchiso bushir telok teimba-ang kuma lemsadagi. Iba jagi Naga nunger yimten jenjang tajungba ka latettsüba mapangsa atsülanger, ashiko, Naga yimtenbo iba amai dang ano talangka aotsü südi.

OLEMSABANG

Tanemba jenti liaka Khrista yimli wazüka yudi

Dr. R Zulu Jamir

Alima putu ajak nung Yisu Khrista dak amangba agi amokmerenba aser rishikangshia südaktsüba ya kechi tai ajanga ta bilemer? Roman yimli merena aliba mapang Tsüngrem chir Khrista alimai aru. Herod chubai anir yimsüsür ajungai Tsüngrem chir Yisu Khrista atsüngtoktsü tasa aika asa. Roman yimli nungsa Nero yimsüsüba mapang 54-68 AD nung Yisu Khrista dak amangbapur ajak samatsütsü nükjidong nung rishikangshia südaktsütsü tasa balala amshia inyak. Yisu nütsüngtem Yohan dak alaka tanüngba nütsüng ajak rishikangshia südaktsü. Saka rishikangshi koma tuluba liasü, yamaji Khrista yimsü tuluba jangrua ao. 313 AD nung Roman yimli nung yimsüsür Constantine-i Yisu Khrista agizük, iba sülen Roman yimli nung Khristan yimsü senso ajak asoshi tamangba yimsü asütsü agizüktsü sangdong. Ibai Tsüngremer ain mapa tulu jungkai adokba rongnung ka lir.

1933-1945 mapang Germany nung Adolf Hitler lenisüba kübok Nazi telok tashi kanga ulua aküm. Adolf Hitler yimsüsüba tendak Germany nung Arogo meyi terti (eighteen thousand churches) liasü. Item rongnung Arogo meyi aseme (3000 churches) Hitler-i aniba Nazi telok anem. Kodang Hitler yimli Germany nung amenok, pai item Arogo nung Pastor-i anir amangbapur ajak tepseta intok. Adolf Hitler tsüngrem ama kümer yimsüsüba mapang küm ishika tsüngta nung tai maketba Yihuda nunger million 6 tashi tepset. Hitler ama shibai pei yimsüsüba mendenji ajak madak tematiba kuma tashi amshia noktak, mapang tatsüka tsüngta nung tsüngrem kümnüsang yimli jenjang makai sama.

Tanü asen India nung küm aika Yisu dak amangba agi rishikangshia südaktsüba zünger mezüngdangma ajangshia arur. Khristan school rungtoktsüba, tenlaki rungtoktsüba, aser pastor taküm aser kibong den amangbapur jenjang makai samatsüba item temeten kong lir? India nung Khristantem kecha tai makai rishikangshia südaktsur telokji RSS Hindu tamangba yimsü ya lir. Tia kangasa maka iba Hindu tamangba yimsüi tentetba political party ajanga küm ter tashi India ajunga amokbanga yimsü süa arur. India nung RSS teloki dang ano maneni yimsü süa ora, India senso tajung tali majungtsü. Anungji, tamajungba agi memenep dang mera tajung agitsü mapangbaji tang ya lir. Tanü democracy lima ka nung senso ka temeten ajak nembanga yutsür, ozüng tenük tapok kümdaktsür tashiyim mapa inyakba ya tetamatsü ulura. India ama democratic lima ka nung prime minister aser legislative assembly member ajak nüburtemi shimteter. Saka tanü ruling political telok ket nung; Reserve bank of India, Supreme Court, Media-Technology aser Military tashi ajak amshia yimsü asüba ajanga tanüngba nüburtem jenjang aser temeten maka. Temeim Khristanpurtem, asenoki shimtetba political tashi amba telok kati asenok khristantem aser minorities telok balala rishikangshir süra, kechiba rishikangshir telok ka nem asen temeten agütsütsü? Iba ama tetsübuttsü aketba telok ka nungi kümzüka alitsü asoshi Khrista dak amangbapur shiai; mangdang akaba, sobaliba, kin kidong, aser tamangba yimsü ajunga kasa meimba lenir nem asen meyonngem agütsüdi. India lima ajunga nung Khristantem dang masü, saka tamangba yimsü balala den Hindu nungeria pei nübur anemba kanga bulua angur. Ya India lima nung temelenshi ka arur südi ta bilemer. Anungji, shirnoki na aser Yisu anemer, parnok asoshi asen temeten magütsüli. Mapang aser tensa tamajungba agi memenepdang, item telok nem yimsü asütsü yimli aser sabang memelatsüsa noktangdi.

Temeimbatem, Daniel 1:8, nung shia lir, 'Saka Daniel-i pei mulungba nung chubar chiyungtsü tajung mesüra pai yi ajemba agi pa sasa pa memenentsü ta mulungtet.' Asen taküm aser lokti nunga temelenshi asoshi temulungtetba ka dang nungdaker, aser aji ne telemtetba tajungji lir. Tanü Khrista dak amangbapur shiai temenen inyakyim matsüngdang iba o ya tasü itta ashitsü nungdaker. Asen lima nung Yisu meimba pur jenti tenüki angur. Arung ochiji yimdong nung laoa lir, asenoki iba ochibaji mesodi. 13th April 2024, anepdang 3:49 am süia aodang asen Aor asoshi Tsüngremi mangdang tejangja ka sayu. Mangdangji yamai liasü; asen Aor telok tulu ka tzüyim ka ajangdanga aotsü kecha lenmang makai lia, ola kati ashi! tatsüka or iba tzüyim ajangdangtsü lenmang ka lir, anungji iba jagi oang ta ashiba den iba tzüyim ajangtsü lenmangji ngua tzüyimji atendanga ao.

Temeimbatem, Tsüngrem mezüng chir ka ama asen Naga nunger rongnung asen Aortem Pai shimtet. Tanüa asen Aor ajanga Naga kin tejakleni anitsü Tsüngremi asenok amshinür. Israel nüburtem tejakleni temerem tzüyim, aser tesülen Egypt nunger kor talungtsü nung aria arur ta asüba tensa ka nung, Tsüngremi tzüyim ana kuma sadanger Israel purtem anitetba ama, asen Aor asoshi Tsüngremer sentong tulu ka lir. Anungji, iba temoatsü aosu memeküptoktsüsa Tsüngrem sentong dangi ka kuma lungjemshidi. Asen senso temeten aser asen kümtetdakba Yisu kecha dena memeyoktepli. Atangji tongpangji tulu, Yisu-ia Yohan 16:33, nung shia lir, 'Alima nung nenok timtem tekangshi kar, saka tasü itang ni alima kokogo.' Atangji timtem tekangshi jenti liaka asenokia tongpang ajak Yisu tenüng nung koktetsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Al ya osangtajung prokba hadir ka ama amshitsüla: An Jong-bae



Pastor An Jong-bae

August 07, 2026: South Korea nunger Laishir aser missionary kati Khristantem dang, AI (Artificial Intelligence) ya amokmeren ka ama masü saka Yisu Khrista osangtajung proksü atema hadir ka ama amshitsüla, ta ashi.

International Futures Studies Association nung Chairman aser Jeju AI World Mission Center nung züngsem, An Jong-bae-i, Arogoi AI ya metsübütsüla saka agizükteta tajungtiba nung amshitsü merangtsüla, ta ashi.

Pastor An-i, "AI ya hadir ka lir, tamshirtemji meimchirtem aser ajak madak Kiburji Tsüngrem lir. Meimchirtem atema AI ya temoatsü ka mesüra atakatem ka akümtsüji technology masü saka AI amshirtem dak keta lir," ta ashi.

An-isa Khristantem dang "AI media missionaries" akümtsü ayongzüük.

Pastor tem, Sunday school tesayurtem, lanurtem, tekülem aser tetushi lenirtem aser tamangertemi sobaliba aser oshi balala jembirtem den Khrista osangtajung lemsateptsü atema 'contents' yanglutsü asoshi AI amshitsü akok, ta pai ashi.

"Khrista osangtajung dak

sendakba 'contents' ji AI amshitsü angazükba agidangbo meinyaktettsü, ajisüaka Laishiba junga angatettsüla aser sobaliba-oshiopen balala benshiba nüburtemji tama angatettsüla," ta pai ashi.

An-i, AI ya ajanga mission filed tonga oa inyakbabo memelentettsü, ajisüaka mission wadang ulutettsü, ta ashi.

"AI putu mapang ka nung Khristantem aikati alima mission nung shilem agitettsü. Region, mapang, senotsü indokba aser oshi dak sendakba tetsükdaktsü ajak kokteta AI ajanga mission wadang inyaktettsü," ta pai ashi. An-i, "AI ajanga oshi meyipzüktettsü saka sobaliba aser nisung ka tebilembabo jungjunga mangatettsü. Oshi balala nung meyipzükbba 'content' ji mezüng local nisüngtem aser Arogo nung lenirtem nem tama reprangdaktsütsüla," ta ashi.

Sayutsüngirtem aser pastor temi onük renemtsü aser Bible study atema AI kanga bulua amshitepba dak sendakba nung An-i, AI ya research assistant ka ama amshitsüla, saka sayutsüngitsü, pastoral care mesüra tanela len sayur amabo mamshitsüla, ta ashi.

Paisa, "AI dak kanga metalokba ajanga pastor ka akhümket samatsü. Lai O junga mebushii AI ajanga zülutsüba Tsüngrem O terenemjem dang sayutsüngiba yimya sübadaktsüra ibaji ajanga pastor tanela, sempet aser akhümket samatsü," ta ashi.

"AI ajanga mapang kümzükbba ajakji Tsüngrem O bushisba, sarasademba, Arogo nung züngsemtem anepaluba aser nütsüngsüba nung indoktsüla," ta pai ashi.

"AI-i Laishiba dak sendakba information aser counseling indang telangzübatem agütsütsü akok. Ajisüaka AI-i Tsüngrem mekülemtettsü, tatok memeshitettsü aser Tanela Temeshi leniba magizüktettsü," ta pai ashi.

"AI putu mapang ka nung pastor tem aser missionary tem tanela jenjangjisa tongtibangba asütsü. AI putu mapang ka nung meimchirtemi Tanela Temeshi nem len anidaktsütsüla aser Tsüngrem den tesendaktep yanglushitsüla," ta pai ashi.

Laishiba menüngtsü atema Martin Luther-i printing press amshiba atishia pastor An-i, "Tanü Arogotemi kanga shisa kaa technology amshitsüla. AI amshiba ajanga Khristan ajaki alima mission nung shilem agitettsü. Nisung kati atenba Khrista osangtajung ken kaji oshi balala nung meyipzüka alima tesem balala nung atentsü akok. Nisung kati yangluba mission video kaji alima tesem ajaklen proktettsü," ta ashi.

"Tatem nungbo AI ya hadir ka lir, tamshirtemji meimchirtem lir aser ajak madak Kiburji Tsüngrem lir. Korean Arogo aser Khristantem ajaki Lai O nung ajemdaker Khristan tangatetba nung osangtajung proksü atema AI ya tajungtiba nung amshitsüla," ta pai ashi.

Odisha ya Arogo maliba state ka akümtsü tayongzükbba agütsü



July 28, 2026 nü Odish nung Swami Laxmanananda Saraswati taküm otsü kaket "Vedanta Kesari Swami Laxmanananda Saraswati: Kruti O Byaktitwa" sayadang tangokba noksa nung angur.

August 07, 2026: Anogo ishika tejaklen Odisha nung kaket ka sayaba sentong ka nung BJP sorkari Hindu nunger lenir ka nem tetushi agüja pa nüngtem nung state medical college tenüng jaloktsü, aser iba sentong nungji o jembirtemi Odisha ya 'Arogo maliba state' akümtsü atema tayongzükbba agüja liasü.

July 28, 2026 nü state yimtiba, Bhubaneswar nung

agiba sentong nungji Chief Minister Mohan Charan Majhi aser taoba mapang Union Minister Dharmendra Pradhan na den tetushi tejaoker Rashtriya Swayamsevak Sangh (RSS) general secretary, Dattatreya Hosabale nunger densema liasü.

Swami Laxmanananda Saraswati taküm otsü kaket "Vedanta Kesari Swami Laxmanananda Saraswati:

Kruti O Byaktitwa," (Swami Laxmanananda Saraswati, Champion of Hindu Philosophy: His Work and Personality) ya Bipin Bihari Nanda aser Banchhanidhi Panda nati zülü. 2008 küm August 23 nü Odisha kübok Kandhamal district nung VHP lenir, Swami Laxmanananda Saraswati khasetba sülen Hindu nungertemi Khristantem anema apusoa liasü.

Saraswati khasetba ya Khristantemi lir ta melung melemi Khristan aika tepset aser kiojen aika rongdokja liasü. Ajisüaka tesülen Maoist telungpurtemi Saraswati ji parnoki khaset, ta nangzüka liasü.

Iba mapang nungji Kandhamal nung Khristantem teimba ser nisung 100 dak tali asü, nisung 56,000 jenshi aser Tenla ki noklang aika densema ki 6,000 raksaja liasü.

ANOGO ABEN TSÜNGREM DEN

Temeshiba Asoshi Merangba Ibri 12:9-14

Ajak den yimjung, aser koba temeshitetba alema shingaia Kibuba mangutsü, iba temeshiba aria aria oang. Ibri 12:14

Tanela nung ainbaji jangratementsü lir. Asenok tanela nung koda aintsü, tali temeshiba akümtsü aser Tsüngremi mulungba nem koda bendanga agütsütsü? Tsüngrem tanela ain ajanga dang inyaktet.

Yisui asenok dang Tanela Temeshi asoshi sarasademtsü sayu."Ajangla, nenok mejungia, nenok chir nem sempet tajung agütsütsü metetra, kotak nung aliba nenok Tebui pa dang meshirtem nem oset tajung koda tali magütsütsü." (Matt.7:11). Tanelai Pa o ajanga mapa inyaker asenok tebilemba aser mapa Tsüngrem tebilembai azüokdaktsütsü asoshi asenoki anogo shia Tsüngrem o nung shisadangtsü nüngdak.

Tsüngrem nem kodang asen taküm bendanga agütsüdir, asenok tarensena ainer. Asenoki tangar asoshi teti sarasademmer, taitok agütsür, aser asen mulungjang nung tesünep alir. Asenoki sen nung tali temulung magütsür, shisabulu tali masür, aser tenüngsang tali agütsür. Tenük merem malir, majung masüker, aser tali tangatetba akümer. Temulung ajema mekümi tali pelaa alir. Asenoki abensatok ama mebilemi, teti renloka alitsü bilemer. Asen ajaki ashitsü, "Khrista mapa inyakba agi ni tang aliba dang nungi tajungba akümtsü akok."

Taküm Tsüngrem Tanelai shia aruba ozü kümtetdakba dak amangtsü tamang agütsüba asoshi tenüng asanger. Temeshiba asoshi merangtsü onok dang yariang. Amen

Sangküm Germany nung JESUS27 revival conference agitsü

August 07, 2026: Germany iba sentong nungji nisung 600 nung denomination kecha shi aden.

German evangelical news agency IDEA den jembidang sentong ayongzükertemi, nung Germany oshi jembiba lenirtem aikati Arogo aser Khristantem adenshia loktiliba asentenshitsü atema sarasademtsü, Lai azüngtsü yongyar, ta ashi.

Association of Free Evangelical Churches in Germany [Bund Freier evangelischer Gemeinden, FeG] Regional Secretary, Reinhard Spincke aser Bible & Confession [Bibel und Bekenntnis] Deputy Chairman, Markus Till nati, iba sentong agiba ajanga tekülem kidangi

aoertem teimba akümtsü imlar, ta ashi.

Spincke aser Till nati, "Arogo aikati tanela asentenshi, telongjem aser Khrista osangtajung proksü jangrar," ta metetdaktsü.

Tenatisa, chichiba telongjem ajanga Arogo kanga aintsü aser tiyongtsüji Khrista aser Tsüngrem O südaktsütsü, ta ashi.

Iba sentong ya shilem pongu lemsar agitsü aser onük 24 nung workshops agitsü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Zülutep

- (v) nisungtem tsüngda osang zülur yoktepba, zülü nung toktepba
(taking correspondence, writing competition)
* Akhidangbo medemertem tsüngda shiti kangasa zülutep aser kaketreju nunga aiben otsü toktepa zülutep.

Züluyim

- (n) tatongi züluba (method of writing)
* Züluyim meteteremi dang kaketa junga zülur.

OLONG PAITEP # 7591

1			2					3		4
					5					
6										
7	8								9	
10					11					12
		13						14		
15										
						16				

TIPIEN

- Ozüng anema inyakertem puoka ayudak - (5)
- Okshia - (6)
- Ak-i achiba - (4)
- Shisa meputepi asatep - (11)
- Temenen tulu rongnung ka - (11)
- Süngdong tamendakdak - (4)
- Kibong nung tanurtem - (6)
- Talangka mao - (5)

LANGTSÜNGLEN

- Tekolak mabensa - (5)
- Yong-i atakba oset - (3)
- Jara atakba aou - (3)
- Ano tejen maküm - (5)
- Tali - (4)
- Süoshi apet - (3)
- S_ _ _ i - (3)
- Wako - (5)
- _ _ _ _ menden - (4)
- Ata-a liasü - (5)
- Tekolakba - (3)
- Tawa/tang - (3)

OLONG PAITEP # 7590 TELANGZÜBA

TIPIEN:

- Tesangra, 5. Mungo, 7. Kisen, 8. Salem, 12. Semki, 14. Kilem, 15. Kensü, 16. Sangpang.

LANGTSÜNGLEN:

- Temesen, 2. Raksa, 3. Aon, 4. Aso, 2. Nile, 9. Alizüng, 10. Omen, 3. Lemta, 13. Ola, 14. Kin.

NAI-A YA METETTER MA



Arishi küm 97 tain British tsür kati wing-walking asüba ajanga lai tesüiba nung yanglua aliba Guinness World Record ka ajatetogo. Iba tantsür ya Cheltenham nung alir Betty Bromage lir aser la stroke sür küm ka lir August 4, 2026 nü wing walking süteta liasü. Iba ya la arishi küm 97 ser anogo 127 lia RFC Rendcomb Air field nung inyakteta liasü.

2022 küm Betty Bromage-i la arishi küm 92 tain lia "oldest female wing walker" otsü yanglua liasü saka ibaji lai ajatetogo.

Longding district nung ULFA (I) züngsem 4 temai adok



Itanagar, August 7, 2026

(Agencies): Arunachal Pradesh kübok Longding district nung 44 Assam Rifles aser Longding Police tsüngdang ULFA (Independent) züngsem pezü temai adokogo.

Telungpurtem ya LC Ajay Asom (33), LC Biplob Asom (31), LC Monei Asom (28), aser Pvt Bolin Asom (22) nunger ta jangjaogo aser parnok Wakka nung temai adok.

Parnok temai adokdang

pistol pezü aser injang live rounds 17 bener aua agütsüogo.

Parnok temai adokba ya Longding district nung counter-insurgency maparen nung takok ka ama züngshir aser maneni bushisüngdang südar.

Manipur nung land portals 8 den app ka sayaogo

Imphal, August 7, 2026

(Agencies): Manipur sorkari August 7, 2026 nü online portals 8 aser LR Manipur mobile application sayaogo. Iba ya land records digitize asütsüba aser Land Resources Department ajanga agütsüba services tipatemsü atema lir.

MSFDS, Palace Compound, Imphal nung Chief Minister Yumnam Khemchand Singh-i digital platforms sayatsüogo.

"Department-i mapang talangka land records anepalua arudang timtem kanga ajuruogo kechiyong records aika 50 tema

tejen lir aser documents aika majung. Tang portals aser mobile application sayaba ajanga item khurettem koktetsü aser records digitize asütsü aser ali dak sendakba services tajungba akümtsü" ta CM Khemchand-i ashi.

Iba maparen ajanga land records ayuba nung tashitsü malitsü aser ketdangsürtemi digital platforms yangluba atema tenüngsang agütsür ta pai ashi.

Tanü sayaba portal 8 ji Permission for Registration Portal, Change of Land Use

Portal, Allotment of Land Portal, Land Acquisition Portal, GIS-based Management of Villages Portal, Single Digital Gateway, Revenue Court Case Management System (RCCMS) aser Online Payment of Land Revenue through Loucha Pathap lir.

Iba sentong nung Home Minister Govindas Konhoujam, Art and Culture Minister Kh. Loken Singh, Land Resources Secretary Th. Kiran Kumar Singh, deputy commissioners, sub-divisional officers aser tanga ketdangsürtem aden.

Lumding-Badarpur Hill Section nung Train Services melenshir



Dimapur, August 7, 2026

(Agencies): Northeast Frontier Railway (NFR)-i New Harangajao station anasa railway tracks (Line-1 and Line-2) yanglushir aser iba ajanga Line-3 ajanga dang Lumding-Badarpur Hill Section senzür.

Iba dak sendakba nung NFR-i train services nung temelenshi talila kar süogo ta Chief Public Relations Officer Kapinjal Kishore Sharma-i sangdong ka nung metetdaksüogo.

Train athiba:

Train No. 15617 (Guwahati - Dullabcherra) Express - 08.08.2026 nungi apusoba athir.

Train No. 15618 (Dullabcherra - Guwahati) Express - 09.08.2026 nungi apusoba athir.

Train No. 15615 (Guwahati - Silchar) Express - 08.08.2026 nungi apusoba athir.

Train No. 15616 (Silchar - Guwahati) Express - 09.08.2026 nungi apusoba athir.

Train No. 15641 (Silchar - New Tinsukia) Express - 08.08.2026 nungi apusoba athir.

Train No. 15642 (New Tinsukia - Silchar) Express - 09.08.2026 nungi apusoba athir.

Train mapang melenshir:

Train No. 15650 (Narangi - Agartala) Express - 08.08.2026 nü 22:30 hrs nung apusotsü.

Train No. 15649 (Agartala - Narangi) Express - 08.08.2026 nü 23:30 hrs nung apusotsü.

Train No. 15609 (Guwahati - Sairang) Express - 08.08.2026 nü 23:30 hrs nung apusotsü.

Train No. 15610 (Sairang - Guwahati) Express - 08.08.2026 nü 21:30 hrs nung apusotsü.

Train No. 15611 (Rangiya - Silchar) Express - 08.08.2026 nü 23:30 hrs nung apusotsü.

Train No. 15612 (Silchar - Rangiya) Express - 08.08.2026 nung apusotsü aliba 09.08.26 nü 05:00 hrs nung apusotsü.

Train No. 15626 (Agartala - Deogarh) Express - 08.08.2026 nü 23:00 hrs nungi apuotsü.

Thailand nung tanur kati nisung 7 khasetba sülen pasasa pakhaset

Bang Kruai, Luroi/August 07 (Agencies): Hokulbarnü Thailand nung tanur kati pa tetsü-tebou nunger dak prangbong agi akhaba sülen Bangkok tezülen kaket reju ka nung nisung pongu den pa khaset, ta police-i ashi, koba Southeast Asia linük nung 2022 sülen iba ama lendong atalokba rongnung tamajungtiba alitsü.

Kaket reju nung asürem ya ajak tesayur aser staff tem lir aser injang khaloktsüsa ya arishi küm 14 tain kaketshir ka liasü aser tebou indang prangbong ka amshia injang 26 khaloktsü, ta police-i ashi. Iba den ano injang 34 ngutet, ta police-i ashi.

Thailand yimtiba, Bangkok tezülen Debsirin Nonthaburi School nungi kaketshirtem nungtepa jena adok aser yirur alirtem ambulances nung inoka bener ao. Emergency workers temi noksa lemsatepba nung nisung ka ambulance anasa stretcher ka nung mejanga aliba aser ano ka doctor kati anepaluba nguogo.

Iba lendong nung nisung 23 yiru, ta police temi ashi, koba Thailand nung iba ama lendong tulu ataloka aruba rongnung tesüsaba alitsü. Southeast Asia

nung civilian ket nung prangbong timba iba linük nungya lir, ta 2017 küm Small Arms Survey ajanga ashi. Education Minister Prasert Jantararuangtong-i osangbener den jembidang asürtem rongnung tesayur aser kaketshirtem dena lir ta ashi. Iba mapa ya kechi tebilemba nung inyakar bushisüngdangba mapang lir, ta pai ashi.

Thailand nung taküm kaket reju nung nisung khasetba ibai tanabuba alitsü, kong February ita linük south tsütsü tesayur ka asü aser kaketshir ka yirua liasü.

Emergency worker Kiatikhun Verapongpradith-i ashiba agi, parnok arudang injang akhaba manen liasü aser par teloki kaketshirtem teperem, teku aser teka yirur aliba anepalua liasü. Parnoki kaket reju floor temalen tebur tesayur ka tasü laoa aliba angu aser ano takdang ka nung tetsür tesayur ka teku aser teka nung yirur aliba ngutet.

Injang tatembangba akhaba sülen iba lendong agütsüsang anepalutsü pa aja ta ashi.

"Onok asemtepa ao aser injang akhasang ya pasasa pa tekolak achichilen khar laoa aliba angu. Onok aodang pa azü

jaja liasü aser onoki CPR tenzük," ta pai ashi. 2025 academic year nung iba kaket reju nung kaketshir 3,100 aser tesayur 147 liasü, ta district ketdangsür temi ashir.

"Iba ama atalokba ya tesüngmangtsüka lir. Asürtem asoshi ni jashir aser asen linük nung iba ama atalokba atema jashir," ta Ato Kilonser Anutin Charnvirakul-i osangbener dang ashi.

Thailand nung nisung ka kijai nisung timtiba khasetba ya 2022 küm atalok, aser iba mapang police nungi anentsür alir kati prangbong aser kotari amshia Bangkok northeast tsütsü ghonda asem azüdokshiba mapang pa kinungtsü, jabaso densema nisung 36 tepset aser tanur 22 daycare centre ka nung mejanga alidak kotari agi atsüng.

2020 küm sepai kati Nakhon Ratchasima nung nisung 29 tepset aser taoba küm July ita prangbong bena alir kati Bangkok market ka nung nisung pongu tepset aser tatem nung pasasa pa khaseta liasü.

Thailand nung civilian ket nung prangbong 10.3 million lir ta Small Arms Survey ajanga asadangteta lir.

Saudi Arabia, Turkey aser Pakistan tsüngta defence pact zülutepogo

Mecca, Luroi/August 07 (Agencies): Saudi Arabia, Turkey aser Pakistan tsüngta joint defence agreement ka zülutepogo, aser parnok ka dak amakbaji asemprong dak amakba ama züingshitsü ta ashir.

Iba tezüngzüktep ya Saudi Crown Prince Mohammed bin Salman, Turkey Tir Recep Tayyip Erdogan aser Pakistan Ato Kilonser Shehbaz Sharif tsüngta Saudi yimti, Mecca nung senden ka amendang sangdong.

US aser Iran tsüngta rara nung Saudi Arabia atsüoka Strait of Hormuz aser Red Sea ajanga rong senzüba nung tetsükdaktsü ajurur lia linük asem ya security tesendaktep akangshitsü lenmang bushitepa liasü.

Saudi Arabia aser Pakistan nati taoba küm joint defence pact ka sangdonga liasü.

US aser Israel nati February 28 nü nungi Iran amakba sülen Iran aser par tembar temi Saudi Arabia aser tanga Gulf linüktem nung tesem kar amak tenzükogo aser parnok indang rong tem nokdanga lir.

Yemen nung Iran-i bhukumba Houthi telungpuri sorkar meyong sepaitem den rarar, shirnok Saudi-i aniba coalition-i yarir.

Taoba ita Houthi teloki Saudi Arabia anema "maritime embargo" ka sangdong aser

Saudi airports, oil facilities aser Red Sea nung tankers dak tenük yoker amak.

Saudi Arabia-i langzüa Houthi nunger alidak tenük yoker amak aser Red Sea aser Gulf of Aden nung rong senzüba kumzüka ayutsü atema naval coalition tasen ka tentet. Hokulbarnü iba pact sangdongba mapang Pakistan indang foreign ministry ajanga ashiba agi, linük asem nung mashi ka dak amakbaji linük asemprong dak amakba ama züingshitsü.

"Mecca Joint Defence Agreement" yagi Sunni linük asem tsüngta kati ka yariteptsü nangzükteper, saka tejangja teinyaktsütem mesangdong.

Turkey ketdangsür kati iba pact ya 'defensive' atema kisüng lir ta ashi.

Israel aser Iran tsüngta rara tatem kati aruba yimya kecha mongutetba atema linük asem yagi tebilemtsü akaba lemsatepa lir aser par linük asemprong asoshi tembar tajung, US-i region nung mepetmesü mazüokteter.

Saudi Arabia ket nung rongsen tashi lir aser nok-nü timtiba alir linük ka lir.

Turkey ya NATO nung mitkar tashi tulutiba jenjang tanabuba nung lir aser advanced defence production capacity lir. Pakistan ket nung nuclear nok-nü lir.

Pakistan indang tashi tait army chief Asim Munir dener Ato Kilonser Shehbaz Sharif ya anogo ka jelia Saudi Arabia nung arua Mecca nung Umrh pilgrimage inyakba sülen tezüngzüktep ya yanglu.

Turkey Tir Recep Tayyip Erdogan ya Saudi Crown Prince Mohammed bin Salman den ajuruteptsü atema Hokulbarnü Saudi Arabia-i arua liasü.

Iran nung rara ajanga Saudi Arabia indang totzü ayokba aser mangdang tulu yur terenlok sentong yangluba nung timtem ajurua lir aser kasa mapang US security umbrella nung temulung malemtsüsa akumer.

Turkey aser Pakistan dak indang-indanga amakba mali, saka region nung rara aliba ajanga par security aser rongsenketzüng nung kongshitsü shisabolur.

Küm ka jungnüa jembishinüa arur Islam yimsü asoshi temeshitiba yimti, Mecca nung iba tezüngzüktep yangluba nungya tetetzü tulu lir.

Pakistan-i Saudi sepai nem küm aika training aser technical teyari agüja arur, aser Turkey aser Pakistan na warships aser training aircraft melentepa lir. 2023 küm Riyadh-i Turkey indang drones alitsü mulungtep, koba defence export contract tulutiba alitsü ta Ankara-i ashi.

PROGRAMME SCHEDULE

INTERNATIONAL DAY OF THE WORLD INDIGENOUS PEOPLES

Theme : “Honouring Midwives; Safeguard Life And Well-being”

Special Guest : Sharingain Longkumer, Hon'ble Speaker, Nagaland Legislative Assembly, Govt. of Nagaland.

Date : 9th Aug. 2026 | Time : 02:00 p.m. | Venue : Town Hall, Dimapur

Flag Hoisting : UN, NEIPF & NIPF

1. Comperer

: Alito Z. Chishi.

2. Invocation

: Dr. Anjo Keikung Former Gen. Secy. NBCC.

3. Welcome address

: Dr. T. Lima Jamir, President NIPF Introduction/Presentation.

4. Opening Special No.

: Discipleship Bible College, Dimapur.

5. Significance of the event

: Shri Anup Chetia, Chairman NEIPF.

6. Speech

: Shri. Khuzoluzo Azo Neinu MLA & Advisor, Science And Technology, Govt. of Nagaland.

7. Ode to Special Guest

: Ungma Senso Telongjem Dimapur USTD.

8. Launching of Souvenir and Exhortation

: Special Guest.

9. War Dance

: Kulolau Shena Old Küqhakulu.

10. Speech

: Shri Bimal Bora, Minister of Industry and Cultural Affairs, Govt. of Assam.

11. Indigenous Bamhum

: Abiogenesis.

12. Speech

: Shri Hamletson Dholing, Advisor to Chief Minister, Govt. of Meghalaya.

13. Performance by

: Assam Cultural Troupe.

14. Speech

: Shri Biswajit Phukon, MLA. Sarupathar, Govt. of Assam.

15. Report

: Secy. General. Shri Ibungochoubi NEIPF.

16. Vote of Thanks

: Shri Kikheto Kika Sumi. Gen. Secy. NIPF.

17. Benediction

: Dr. N. Paphino President Nagaland Joint Christian Forum.

Followed by Love Feast

Tanü De La Espriella-i Colombia tir mapa agizüktsü



Bogota, Luroi/August 07 (Agencies): Hokulbarnü right-wing lawyer Abelardo De La Espriella-i Colombia indang tir tasenba ama mapa agizüktsü, shibai security, temesepba mozü shibelenba aser rongsenketzüng nung temulung agütsütsü nangzüka lir.

Arishi küm 48 tain De La Espriella-i June ita tir election nung takok angu, shibai telungpur telok tema pua merenshitsü aser totzü aser gas sector asendenshitsü nangzüka lir. Espriella ya US Tir Donald Trump den tesendaktep tajung lir aser pa okatsür ama inyaka aru aser taoba mapang elected office nung kodanga memendang.

Latin America nung Peru, Argentina, Chile, Ecuador, Bolivia aser Panama linüktem nung rongsenketzüng tashi mait akumba aser mapa tamajung inyaker tali akumba ajanga nüburtemi temulung melenshia pa nem vote agütsü.

De La Espriella-i leftist Gustavo Petro melentsü. Espriella-i election nung leftist senator Ivan Cepeda madak vote ishika agi takok ngua liasü.

Pai inauguration speech mapang policy aika nung mera

agiba sangdongtsü imlar. Pai policy kar tir tashi amshia inyaktsü akok, saka pa indang sentong aika nung lemsar aliba Congress teyari nüngdaktsü ta aikati ashir.

Telungpur telok tali akumba atema Espriella-i Petro tenüng asen aser yimjung asoshi jembishinüba nung tetsükdaktsü agütsüba tembangtsütsü, mitkari telangzüba tesashiba agütsütsü aser tepuokdak tesem tulu yanglutsü nangzü. Petro-i De La Espriella takok magizükteti lir aser yimti tulutem nung longkak aittsü ayongzü.

De La Espriella ya southwestern Cali nung tenangzüka agitsü, koba Colombia tir rongnung linük yimtiba Bogota nung mesür tesem balaka nung tenangzüktep agir mezüngbuba asütsü.

Iba sentong nung Spain chuba, Argentina, Ecuador aser Chile tir tem adentsü imlar. Unites States nungi acting U.S. Attorney General Todd Blanche-i anir ketdangsür telok ka yoktsü.

De La Espriella-i Vice President-elect Jose Manuel Restrepo dak kanga metaloka liasü, shiba taoba mapang finance minister inyaka liasü. Espriella indang cabinet nungya taoba mapang World Food Program ketdangsür inyaka aliba nungi United Nations anemer Omar Bula ya foreign minister inyaktsü, retired Major General Jorge Eduardo Mora ya defense minister, electrical engineer Maria Arboleda ya energy minister aser Miguel Gomez ya finance minister inyaktsü.

Norway FA-i FIFA tir Infantino dang mapa yutsütsü akhanger



Gianni Infantino

Oslo, Luroi/August 07 (Agencies):

Football ketdangsüba tsütsü atsütepba ya ano mapang talangka manentsü mesük, Hokulbarnü FIFA tir Gianni Infantino indang tembar temi pa bhukuma nokdak dang Norway-ibo pa mapa nungi anentsü takhangba agütsüogo aser European associations aikati pa bhukumba agenogo.

Infantino-i World Cup aser tanga asayamung indang commercial rights nung stake kar yoka sen \$4.2 billion shi bendentsü sentong benokba agenba sülen hopta ka arudang confederations aser national associations tem maneni lemsar lir.

Norwegian Football Federation tir Lise Klaveness-i football community-i Infantino

dak tamang makar ta ashi.

"Tang FIFA tashi ita ketdang asütsü asoshi tentet balalai tamang akatsü nüngdakba pa dak mali. Gianni Infantino atema meyipa maotsü," ta Klaveness-i ashi.

"International football cooperation kanga timtem nung lir, aser asenok lungjemtsü kuli alitsüla, aser onoki FIFA tir dang tangsa mapa nungi anentsü akhanger."

Kasa mapang European body UEFA, kong züngsem 55 lir, parnoki FIFA-i ayongzükba sentong kata nunga shilem magitsü ta amokmerenba nung ajang ajanga nokdaka lir.

Ajisüaka Mexico aser Argentina indang football associations temi Infantino

bhukuma nokdaker aser Brehostibarnü Confederation of African Football's (CAF)-ia pa lenisüba bhukuma ola adoka liasü.

Kasa mapang South America indang CONMEBOL-i jembishinü makai pei mulungba nung inyaksangshiba atema tebilemtsü akaba lemsatepa liasü.

Tawa tembangba World Cup indang co-hosts, Mexican Football Federation (FMF)-ibo par regional confederation den pilaa Infantino bhukumer aser aji masüadang CONCACAF-i pa inyakyim asadangtsü ayongzükba liasü.

CONCACAF ya North aser Central America aser Caribbean nung football ketdangsür lir, aser UEFA den külemi parnoki FIFA aitsü, aser Brehostibarnü parnoki FIFA competitions nung shilem agitsü asoshi tongtipang conditions peria mali ta ashi.

Europe nung football ketdangsüba tentet, UEFAyagi, tarutsü nung iba ama asaya raksatsüsa kodanga memerangtsü ta züngzunga mashi tashi World Cup nung shilem magitsü temlungtetba

nung lir ta ashir.

FIFA indang taruba asayamung, Under-20 World Cup, taruba ita Poland nung asayatsü aliba nung shilem agitsü asü masüar UEFA-i ano mashi.

Asia indang confederation, AFC ya UEFA aser CONCACAF den nokdaka lir, ajisüaka par züngsem 47 aliba nungi Indonesia, Philippines aser 2022 World Cup ayonger Qatar linüktemi Infantino bhukumer.

C O N M E B O L - i Brehostibarnü sangdong nung, Infantino atsüngdoktsü merangba magizüker aser züngsem 211-i vote agütsüba nunga maden ta ashi, aser Mexico-ia kasahi ashi.

"Institutional framework alema oa inyakba kecha FMF-i magizüksü aser tir Infantino-i züngsem 211 associations ajangzüktsü asoshi külemi maneni football terenlok asoshi ayongzükba nung dena lir," ta sangdong ajanga ashi.

Tan hopta Rabat nung senden amenba sülen FIFA-i ashiba agi, World Cup indang tarutsü commercial shilem ka ayoktsü onük benokba nung aibelenba atema züngsemtem dang tatok meshiogo.

March ita Morocco nung FIFA Congress alidang Infantino kümsük pezü buba atema inyaksü asoshi tokteptsü aliba nung iba proposal mechi FIFA nung telemsa adokba

ajanga pa tetsükdaktsü ajurutsü ama ajiteter.

March ita election nung Infantino den tokteptsü candidate tejangja malui, aser 2022 world champions Argentina densema Swiss nungba bhukumer aika lir.

Argentina indang football association (AFA) ajanga Infantino dangi shiti ka züluba nung FIFA-i tesüba küm ter tsüngta mapa inyaka aruba bhukuma aser tenüngsang agüja liasü.

Iba proposal nung aibelen lir ta AFA-i ashi, saka taruba küm Congress alitsü lia FIFA lenir kübok maneni inyaksü ta ashi.

Paraguay indang federation, APF-ia Infantino bhukuma shiti zülü aser maneni FIFA den külemi inyaksü temlungtetba nung lir ta ashi.

Infantino bhukuma aliba melenshiba linük kar rongnung Croatian Football Federation dena lir aser iba mesük England aser Albania nungia mera agiogo.

Asayartemi tentetba FIFAPRO-ia Infantino indang proposal ya ketdangsüba nung tamakok ajuruba kisung masü saka tir indang tashi alia amshiba lir, ta Brehostibarnü ashi.

FIFA-i commercial rights proposal asoshi inyakba ajunga ozüng kübok lir aser ozüng raksaba masü process aser communication dak sendakba nung aibelenba lir, ta ashir.

Nagaland nung mezüngbuba Tech & Gaming Expo ayongzüktsü

Dimapur, Luroi/August 07 (TYO): Nagaland E-Sports Society (NES) ajanga Government of Nagaland den lungjemer August 28-29, 2026 anogotem NBCC Convention Hall, Kohima nung Tech & Gaming Expo (TXG) 2026 ayongzüktsü.

Ibai state nung mezüngbuba technology, gaming aser innovation expo alitsü, kong competitive gaming, game development, technology, education, career opportunities aser creator economy sapang ka nung lungjemdaktsütsü.

Iba expo ya "Where Technology, Gaming and Culture Converge" omen nung ajemdaker Nagaland ya Northeast nung gaming, technology aser innovation atema tesepe tasen ka

kumdaktsütsü nükjidong nung ayongzükter alitsü.

TXG ya competitive gaming dang masü saka technology amshia artificial intelligence densema digital economy, cloud computing aser real-time graphics asoshi multidisciplinary platform ka ama lir, ta iba sentong ayonger ashi.

Iba sentong nungya competitive gaming tournaments, technology exhibitions, learning sessions aser creative performances alitsü. Competitive gaming segment nungya Inter-College Championship alitsü, kong Nagaland tesem balala nung colleges tem nungi shilem agitsü, Mobile Legends indang Open MOBA 5v5 Tournament aser EA Sports FC 26, Clash Royale, Tekken 8, Dirt Rally

2.0, Street Fighter 6 aser Ludo King ama aliba Mini Tournament Series ka alitsü.

Competition categories asem shia nung senpet sen 1,00,000 alitsü, match ajunga live-stream asütsü.

Iba den ano expo nungya Game Development Showcase ka ayongzüktsü, kong local developers aser kaketshir temi pei projects, technology demonstrations aser innovative concepts tem sayutsü.

Iba sentong ya Government of Nagaland indang department balala, Confederation of Indian Industry (CII), NIELIT, YouthNet, NE8 aser Nagaland Tourism densema institutional partners balalai yaritsü.

Osang tejangja aser registration atema www.txg-nagaland.com nung angutsü.

NAA-i 5th National Javeline Day amung

Dimapur, Luroi/August 07 (TYO): Nagaland Athletics Association (NAA)-i 5th National Javelin Day 2026 nüngtem nung javeline throw tetoktepba ka Pilgrim Higher Secondary School, Dimapur nung ayongzükba Olympian Neeraj Chopra-i Tokyo 2020 Olympic Games mapang gold medal anguba bilemteta amung.

Athletics nung India nunger rongnungi Olympics nung Chopra-i mezüngbuba gold medal anguba tushia iba tetoktepba nung lanurtemi tejangraba tulu nung shilem agia liasü.

Purna Konyak, Senior Joint

Secretary, Nagaland Athletics Association ajanga iba sentong nungo tatsüka jembidang, Neeraj Chopra-i takok tulu ngutetba temaitsü aser javeline throw nung lanurtem shilem agitsü ajungmesoa National Javeline Day ya amunger ta ashi.

Iba ama sentong ya ajanga athletics nung shilem tali agitsü ajungmesotsü aser Nagaland nung saisapongtsü sempet alirtem jangjateta lenmang shidak nung anitettsü, ta pai ashi.

Iba anogo Under-14 Boys nung mezüngbuba jenjang Theau H. Buchem-i angu,

tanabuba jenjang Meribemo K. Ngullie aser tasembuba jenjang Mughakupu H. Yesca-i ngua liasü.

Under-14 Girls nung mezüngbuba jenjang Lihike M. Yephthomi, tanabuba jenjang Keleneinu Kire aser tasembuba jenjang Nikuvu Chishi-i ngua liasü.

Under-16 Boys nung mezüngbuba jenjang Lungousang Hengna, tanabuba jenjang Isuka Awomi aser tasembuba jenjang Ngaminhao Dounge-i angu. Under-16 Girls nung mezüngbuba jenjang Ilika Achumi-i ngua liasü.

Barcelona aser Real Madrid na Rodri rakteper, Man City-i memulunger

Madrid, Luroi/August 07

(Agencies): Spain nung football club tulu FC Barcelona aser Real Madrid nati Manchester City nungi Spain captain Rodri alizüktsü asoshi atsüteper.

Osang ajanga ashiba agi, Hokulbarnü Barcelona-i City dang sen € 45 million (India sen 496 crore shi) den performance-related add-ons maongka agütsü, saka magizük. Rodri ya Manchester nung pa indang contract tatemang küm ka nung liaka club yagi midfielder asoshi sen € 80 million (India sen 881 crore shi) meshir, aser ibai Barcelona aser Real Madrid nati kanga junga meteta lir.

Rodri asoshi mezüngbuba mera ya Madrid-i July ita tatemlen agia Manchester City den jembishinü tatem leni arur ama liasü. Arishi küm 30 tain Rodri-ia City nung pa indang contract asendenshitsü memulung aser par linüki meyipa oa Madrid nungi asayatsü jangraba lemsatepa

liasü ta ashir.

Ajisüaka August ita tenzüker jembishinü anendak, kechiaser Madrid-i tezüngzüktep yanglutsü tasak ta jangjatet. Barcelona-i World Cup akoker captain asoshi lenmang bushitar ta August 6 nü osang temai adok aser arishi küm 30 tain Rodri yagia tanga club masü Camp Nou-i ang onüa bilemba lemsatep.

Rodri ya Braca nung World Cup külemi asaya takok angurtem aika aliba agi mesüzük ta ashir, aser parnoki pa den mapang shia Catalan club nung adentsü asoshi mesüzüktsü meranga jembir. Barcelona-i midfielder tali bendenloksü teti nüngdaka liasü, saka Frenkie de Jong yiruba sülen tali nüngdaka akum.

Alima nung Rodri maginüba club aikabo mali. 2024 Ballon d'Or sempet angusang ya alima nung midfielder tajungtiba rongnung ka ta züngshir aser Madrid ya ajem-ajema malitsü südi ta bilemer.

BILEMDANGANG

"Nü jakdang tenem aliba agi masü, nü tsüngsem nung longsang aliba agi na luladaktsür."